



E jere une volte une strie che si clamave Melanie e e veve un mus cu lis alis che al cjantave. Melanie e jere pelose, bavose, il muscli jenfri i dêts e brute di no podê cjalâ.

E viveve intun cjôt a Buri e ducj che i dal païs a vevin pôre di jê. A scugnivin bussâle e puartâi cjâr, vin, formadi, verduris e ogni tant parfin un frut.

Tante int e veve provât a copâle ma ogni volte il mus ju fermave cjantant:

«Tu che âs platât il curtis

No tu larâs vie cui toi pîts»

al cjantave... e ancjemò:

«Tu che tu âs puartât il forcjon

tu larâs vie cuntune maledizion»

Melanie cuant che sintive cjantâ cussì, e tramudave l'om intune carote e la deve al mus.

Tal païs e jere une zovine, puare, sfortunade, di non Catine. E veve i cjavei ros e ducj la clamavin "pêl di carote". Jê e lavorave intune stale e cuant che e netave e cjantave.

Une dì chei di Buri a mandin Catine da la strie. Jê e cjape sù la robe di mangjâ, la cjarie suntun cjaruç e e partìs. Rivade tal cjôt di Melanie, Catine e sberle: «Melanie, salte fûr!»

«Cui sêstu tu par comandâmi?» e dîs la strie, vignint fûr svolant sul mus.

«Ti ai puartât di mangjâ, ma ta lu doi dome se tu mi disis dulà che a son i fruts!»

Melanie, che e voleva fâsi un dôs ridadis, i propon: «Ta lu disarai dome se tu mi bussis i

pîts!»

Catine, cence scomponisi, lu fâs.

La strie, però, rabios e bausarie, i dîs ancjemò: «Brave, ma cussì nol baste. Par savê dulà che a son tu âs di netâmi il cjôt prime che il soreli al rivi daûr dal cjampanili di Buri».

Ma Catine in cuatri e cuatri vot e veve za lustrât dut, tant di podê spielâsi par tiere. La strie, dopo di chê robe, furiose come un cenglâr, i ordene: «Cumò vonde! O tu cjantis miôr dal gno mus, o ti fâs diventâ une verze!»

Ma il mus al cjantave dome cuant che a volevin copâ la strie, invezit Catine no veve tristerie. Cussì la bestie e à dome cuarnât. Catine invezit, usade a cjantâ, e veve la vôs di un agnul.

Melanie, sintint chê melodie, e scomence a vaî e devente buine.

E cun jê dut si trasforme: la strie e torne biele, il cjôt al devente une vile cuntun grandissim zardin e il mus si tramude in un bielissim zovin. Dentri de vile a jerin i fruts che zuavin.

«Grasie Catine», e dîs Melanie, «Tu mi âs tirade fûr de maledizion. Par sdebitâmi ti lassi vivi te mê vile cun gno fi».

E ducj, di chel moment, a jerin vivûts felîçs e contents.

di 2A e 2B - Scuele Medie di Buri
((Alessandra Bardus, Marco Bertelli, Alessandro Bolzicco,
Silvia Cavan, Michele Durì, Giovanni Lerussi,
Alessia Meroi, Irene Micheletti, Claudio Bertoldi,
Alex De Sabbata, Alex Maestrutti, Simone Specogna,
Emma Valentinis, Robert Wesolowski,
Matteo Buttus, Maria Schneider)
#172